

Suenter quater buobas ei igl Ernst staus igl emprem buob dils geniturs Barla e Giusep Monn-Flepp. Naschius eis el ils 10 da december 1944. El ravugl da 7 fargliuns ha el passentau, sco ei era tier nus da lezs onns, sia affonza en ina famiglia purila tier geniturs che sefidavan fermamein sin Diu.

Ir cul bab a perver e las lavurs sil funs han promoviu gia da pign ensi gl'interess per ils animals e la natira. Inagada staus ord scola ei igl Ernst sedecidius cumpleinamein a quella clamada.

Da pign ei sia schliata vesida stada per el in grond impediment, che ha sfurzau el d'adina puspei consultar il miedi dad egl. Mo quei cun pauc success. Era sch'el saveva en scola buca leger quei ch'il scolast scriveva vid la tabla da siu baun ano, han buca tuts scolasts demussau capientscha persuenter. In fatg che ha promoviu tier el sentiments d'inferiuradad.

Denton, inagada staus ord scola ha el cun siu luvrar, mussau ch'ei detti sper la savida da scola era aunc auters talents. Ussa ch'el era in um sc'in cuolm cun detga forza haveva el buca sterment dalla lavur corporala. Star sin pegna e schar dar l'aria pils larischs era buca sia devisa.



Ils emprems onns, avon che surprendre il bein puril sur sesez, segidava el cun ses geniturs. Mo plaun e plaun fa el ses agens plans, tals che savessen corrispunder meglier a sia vesida. In rosch «tgaaras» para ad el pli adattau ch'in muvel cun vaccas. Il medem temps baghegia el era casa cun cascharia, fa sez il signun e producescha in savurus caschiel caura. Mo ses egl dicteschon pli e pli siu mintgadi. Els sforzan il davos pur da cauras el vitg da Sedrun da dismetter sia muntanera.

Mo tuttas quellas activitads fussen pervia da sia vesida mai stadas pusseivlas senza agid da ses geniturs, fargliuns cun famiglias ed autras personas.

Gl'ei era d'engraziar a Diu, ch'ei ha dau negins accidents, cura che gl'Ernst mava aunc sez cun sias maschinas.

Calau da far il pur, ha il destin trauu el da star a casia e far per el il percasa. Dasperas saveva el aunc far cun ina maschina da turnader scadialas, vasas da flurs etc. Ins astga dir, ch'igl Ernst haveva en casa ed era schiglioc in uorden exemplaric. In grond Dieus paghi s'auda en quei grau ad Ursula Deplazes, sia persuna da confidonza cheu el vitg Sedrun,

per la gronda lavur ed igl exemplaric quita.

Ernst havess giu il dretg d'ina renta d'invalids. Mo sia independenza era ad el da pli gronda muntada. El ha mai tratg quella: «Ju vi décider mez e betga schè dicta ils auters». Stuer ir en casa d'attempai ni invalids fuss stau per el sgarschur. En siu dacasa era el cuntents. El selegrava e demussava gronda cordialitad sch'ins fageva ad el ina viseta.

Il davos temps eis el seretratgs pli e pli. La Corona ha dau da patertgar ad el. «Schai mè ain ruaus. Ju vi esser persuls. Niessegner o schon quita da mé».

Gl'ei iu sco el ha gjavischau. El ei morts a casia. Nus havein anflau el morts en sia stiva.



Piarder la vesida pli e pli e vegnir tschocs, quei giavischan ins a negin. Quei ei stau la sort digl Ernst. Quella grevezia ha fatg vegnir el adina pli e pli malsegirs gie sceptics. El fidava mo a paucs pli. Per nus, che havein buna vesida, buca adina lev da capir. Mo co havessen nus reagau en sia situaziun? Ussa ei Ernst ius tier Niessegner, tier quei Segner, ch'ei

staus per el il grond rempar en sia veta. Ernst, che ti has negins quitaus mundans pli, giavischein nus a ti da tut cor. La beaded celestiala en cuminonza cun tes geniturs e tiu frar Tarcisi seigi la pagaglia. Nus cartein ella veta perpetna e perquei dat ei in di in sin seveser.

Ernst, ruaussa en pasch!